

## АКАФИСТ ЛАЗАРЕВУ ВОСКРЕШЕНИЮ

### Кондак 1

Возбранный Воеводо и ада Победителю, Ты, яко имеяй победу над смертию, Лазаря Четверодневнаго из мертвых воздвигл еси, и всем радость, свет и воскресение явил еси; мы же недостойнии Твоему нас ради снисхождению благодарение приносяще, от души вопием Тебе: Иисусе, Лазаря прежде Твоя страсти из мертвых воздвигнувый, яви нам Свое Воскресение.

### Икос 1

Ангельския силы в радостный трепет приидоша, зря Твое, Сладчайший Иисусе, в Вифанию пришествие, идеже Ты, не имеяй где главу подклонити и злобою иудейскою везде гонимый, всегда обретал еси по трудех благовестия покой душевный, мир, любовь и тишину у друга Твоего Лазаря, егоже и Сам до конца возлюбил еси с сестры его Марфою и Марией, яко тии всегда с верою и любовию служаху Тебе, слушающе при ногу Твоею Слово Твое. Таково человеколюбное снисхождение Твое воспоминающе, со умилением сердечным вопием Тебе: Иисусе, Любы Предвечная, до любви к человеку до конца низшедый. Иисусе, Милосте Безмерная, Лазаря с сестры его в любовь Свою приявый. Иисусе, благословенный дом Лазаря во днех плоти Своея с любовию посещавый. Иисусе, Божественным Словом Твоим любящая Тя души тамо в сладость, много насыщавый. Иисусе, Вифанию, отечество Лазаря, местом покоя Твоего избравый. Иисусе, велия дела силы и любви тамо прежде Креста Твоего явивый. Иисусе, Лазаря прежде Твоя страсти из мертвых воздвигнувый, яви нам Свое Воскресение.

### Кондак 2

Видяще сестры праведнаго Лазаря Марфа и Мария, яко брат их лютою болезнию зело страждет, не предашася унынию, не впадоша в отчаяние, но к Тебе, Господи, Целителю недугов, со упованием посласте, с верою глаголюще: “Господи, се егоже любиши, болит”. Сему последующе, и мы во всяком обстоянии да не предадимся унынию, но с упованием да вопием Тебе: Аллилуиа.

### Икос 2

Разум чист имеша ученицы Твои, Господи, обаче не разумеша, почто абие не пошел еси в Вифанию к другу Твоему Лазарю исцелити его, егда приял еси весть о лютом недуге его, но рекл еси пришедшим от Марфы и Марии: “сия болезнь несть к смерти, но к славе Божией, да прославится Сын

Божий ея ради”. Мы же ныне ведуше, яко хотел еси сокровенную глубину веры и любви их явити, и большее чудо пред страданиями Своими совершити, с любовью зовем: Иисусе, любви полный, любящая Тя сердца святых сестер Лазаревых испытуй. Иисусе Всеблагий, болезнию братнею к чаянию велия Славы Божия тех обращаай. Иисусе, велий в чудесех Своих, хотяй над Лазарем всему миру Славу Свою явити. Иисусе, Дивный в советех Своих, положивый в Вифании величия Своя совершити. Иисусе, смерти не сотворивый, скорбящим сестрам Лазаревым не бояться смерти брата повелевый. Иисусе, к смерти волею грядый, сомнящимся учеником победу над смертью явити восхотевый. Иисусе, Лазаря прежде Твоея страсти из мертвых воздвигнувый, яви нам Свое Воскресение.

### **Кондак 3**

Силою Божества Твоего ведуше, яко належит Ти прежде Креста Твоего, Всеблагий Господи, явити над Лазарем силу Свою, да сущии с Тобою ученицы не устрашатся страданий Твоих и уразумеют из мертвых Воскресение Твое. Сего ради, услышав, яко болит Лазарь, друг Твой, не поспешил еси исцелити его, пребыл на немже бе месте два дни, да боголюбивыя сестры его и пред лицом смерти брата своего пребудут верою и любовью горяще, поюще Тебе: Аллилуиа.

### **Икос 3**

Имуще предведение Божественное, Всеблагий Господи, Ты рекл еси учеником Твоим: “Идем в Иудею паки”, и потом: “Лазарь друг наш успе, но иду, да возбужу его”. Егдаже ученицы не разумеша, мняще, яко о успении сна его глаголеши, тогда необинуяся рекл еси: “Лазарь умре. И радуюся вас ради, да веруете, яко не бех тамо, но идем к нему”. Тогда Фома, видев, яко ученицы страх имут во Иудею ийти, яко ныне уже искаху Иудеи камением побита Тя, со дерзновением рече им: “идем и мы, да умрем с Ним”, научающе и нас без страха последовати Тебе и воспевати тако: Иисусе, друже Лазарев, друга Твоего от смертнаго успения возставити грядый. Иисусе, Вифании похвало, и весь Лазареву радость и воскресение несый. Иисусе, Любы Неизреченная, плач и рыдания сестер Лазаревых услышавый. Иисусе, Милосте Безконечная, овча свое бездыханное оживити изволивый. Иисусе, с Лазарем в Вифании погребенным, погреби моя лютыя прегрешения. Иисусе, с Марфиными и Марииными слезами прими о гресех моих тяжкая воздыхания. Иисусе, Лазаря прежде Твоея страсти из мертвых воздвигнувый, яви нам Свое Воскресение.

### **Кондак 4**

Бурю внутрь имуще помышлений сумнительных, Марфа и Мария горько проливаху слезы над гробом Лазаря, поминающе со скорбию обетование Твое, яко болезнь Лазарева не к смерти есть, но к славе Божией, зане тыя

лишени уже быша прежняя надежды, зряще брата своего во гробе пребывание и тела его разрушение и смердение. Ты же, Господи, об ону страну Иордана ходяще, глагола еси учеником Своим: Радуются, друзи мои, вас ради, яко не бых тамо, да увесте, яко вся могу, Бог сый. Идем убо оживити его, яко да смерть яве ошутит сего победу и совершенное разрушение, да воспоете со всеми верными: Аллилуиа.

#### **Икос 4**

Слышав святая праведная Марфа, яко Ты, Господи, в Вифанию грядеши, четыре дни Лазарю во гробе уже бывшу, изыде во сретение Тебе, Марии же дома сидевшей, и глаголаше Тебе, утешения ищущи: “Господи, аще бы еси zde был, не бы брат мой умерл. Но и ныне вем, яко елика аще просиши у Бога, даст Тебе Бог”. Сию веру скорбных сестры Лазаревы в велицей печали ея видевше, со умилением в души зовем Тебе: Иисусе, к четверодневному мертвецу стопы Своя направивый, посети и мене во гробе отчаяния суцаго. Иисусе, в Вифанию пришедый прияти в любовь Свою скорбящих сестры, приими и мене заблудшаго. Иисусе, Марфу многотрудную беседою Своею утешивый, утеш и мене о гресех скорбящего. Иисусе, Марию с чаянием дома сидевшую не забывый, не забуди и мене во уныние впадшаго. Иисусе, смерть, трепетати начинающую, пришествием в Вифанию устрашивый, смерти вечней не предаждь мя. Иисусе, ад горький топтанием ног Твоих, к Вифании грядущих, страха исполвивый, адских мук избави мя. Иисусе, Лазаря прежде Твоя страсти из мертвых воздвигнувый, яви нам Свое Воскресение.

#### **Кондак 5**

Боготечней звезде ночный мрак разгоняющей подобно бысть предречение Твое, Господи, егоже, яко Владыка живота и смерти, изрек еси Марфе, глаголющи: “Воскреснет брат твой”. Она же, яко еще немощная в вере, колеблющаяся веровати, яко брат ея может ныне по слову Твоему из мертвых возстати, глагола Тебе: “Вем, яко воскреснет в воскрешение, в последний день”. Мы же недостойнии Тебе Победителю смерти с верою вопием: Аллилуиа.

#### **Икос 5**

Видев, яко сердце святых Марфы, печалию пораженное о смерти Лазаря, не может еще веровати, яко и ныне, Господи, Ты силен еси из мертвых воскресити его, Ты рек еси со властью, яко животом и смертию повелеваяй, желаящи возбудити ю от таковаго малодушия: “Аз есмь Воскресение и Жизнь. Веруй в Мя, аще и умрет, жив будет”. Мы же сему Божественному обетованию внимлюще, и живот вечный улучити хотяще, со упованием зовем Ти: Иисусе, пришедый в Вифанию проповедати Воскресение, воскреси мя во страстях всего истлевшаго. Иисусе, предвозвестивый Марфе Лазарево вос-

крещение, воззови мя от многих грехов возсмердевшего. Иисусе, обновивый веру Марфы в Воскресение, обнови душу мою умершвленную грехми. Иисусе, призывый всех нас уповати о умерших, просвети жизнь нашу омраченную страстьми. Иисусе, живыми и мертвыми обладай, не предаждь мя горькой смерти в преисподней вечно мною обладати. Иисусе, живот вечный нам даровавый, подаждь ми наследие блаженное на небесех восприяти. Иисусе, Лазаря прежде Твоя страсти из мертвых воздвигнувый, яви нам свое Воскресение.

### **Кондак 6**

Проповедница Твоего, Христе, Божества явися святая Марфа, во исповедании своем Петру, Верховному Апостолу Твоему, равная: сия бо, егда вопрощена бысть от Тебе, емлет ли веру, яко всяк веруай в Тя, аще и умрет, жив будет, глагола Тебе: “Ей, Господи, аз веровах, яко Ты еси Христос, Сын Божий, Иже в мир грядый”. Мы же сему исповеданию с благоговением внешнеюще, с верою и любовию вопием Тебе: Аллилуиа.

### **Икос 6**

Возсия новый свет веры и надежды у святых праведных Марии, дома в скорби сидевшей, егда прииде к ней сестра ея Марфа и тайно от пришедших ко ея утешению иудей возвести ей о Твоем, Святой Господи, пришествии, глаголюще: “Учитель пришел есть и глашает тя”. Та же, слышавши сие, возста и скоро пришедше падше, поклонися Тебе и лобызающе пречистии нози Твои и утешения ищущи, глаголаше Тебе со слезами: “Иисусе, живота Начальниче, аще был бы еси zde, не бы умерл мой брат”. Иисусе, смерти Разрушителю, аще бы пришел еси семо, не бы лежал Лазарь четверодневный во гробе. Иисусе, Утешителю Добрый, утеши в скорби сущую душу мою. Иисусе, Учителю Благий, научи мя творити волю Твою. Иисусе, Наставниче безнадежных, настави мя с надеждою и терпением нести крест мой. Иисусе, Прибежище сирых, даждь ми при ногу Твоею обрести в скорби моей покой Твой. Иисусе, Лазаря, прежде Твоя страсти из мертвых воздвигнувый, яви нам Свое Воскресение.

### **Кондак 7**

Хотящей Марии излити при ногу Твоею вся чувства своя о Лазареве лишении и любовь к Тебе, Господи, Ты же увидев ю плачущуюся, и пришедши с нею иудеи плачущия, огорчился еси духом и возмущился еси, человеческое показуя, и прослезился еси Сам, да и мы немощнии, в скорбех суще со дерзновением припадше к Тебе, изливаем в немощи из глубины души слезы своя, и со умилением вопием Тебе прослезившемуся о наших скорбех: Аллилуиа.

### Икос 7

Новое и неизреченное снисхождение и человеколюбие крайнее явил еси, Сладчайший Иисусе, егда зря Мариины слезы, прослезился еси Сам. Иудеи же неции, видяще, яко о Лазаре плачещи, глаголаху: “Виждь, како любляше его”. Друзии же, в окаменении душ и сердец суще, не восхотеша разумети Божественное сострадание Твое немощем нашим, мняху самому Тебе немощну быти и глаголаху в Твое посмеяние: “не можаше ли Сей, Отверзый очи слепому, сотворити, да и сей не умрет”. Мы же прославляя человеколюбие Твое, от души вопием Тебе: Иисусе, слезы о Лазаре с сестры его источивый, струями слезными очисти грехи мои. Иисусе, Марфины и Мариины слезы утоливый, плачем Своим утоли печали моя. Иисусе, трости сокрушенныя не преломивый, богозданный храм души моя не сокруши во мне. Иисусе, льна курящаяся не угасивый, горящий светильник веры и любви не погаси во мне. Иисусе долготерпеливый, немощем нашим даже до конца спострадавый, в немощи моей укрепи мя. Иисусе человеколюбивый, даже до возскорбения за ны и до слез снизшедый, вечнаго плача исхити мя. Иисусе, Лазаря прежде Твоя страсти из мертвых воздвигнувый, яви нам Свое Воскресение.

### Кондак 8

Странно бе вопрошание Твое, Христе Спасе, егда всем плачущим, Ты о Лазаре вопрошал еси: “Где положисте его?”, зане, яко Бог вся ведый, Ты предрекл еси смерть его, како же ныне, бездна сый ведения, не веси где погребен есть друг Твой? Обаче ныне вопрошаеши не неведый, уведети хотяй, но яко человек, человечески глаголя, хотяй скорбящая сестры Лазаря утешити и сего ради гроб его посетити. Таковое человеколюбное снисхождение Твое славяще, поем Тебе: Аллилуиа.

### Икос 8

Весь сый Любовь, Весь сый желание наше, Господи Иисусе, Ты, пришед на гроб Лазарев, паки претя в себе о жестосердии тамо бывших, повелел еси взяти камень от гроба, да возсмердением смерти заградятся уста неверных. Марфа же, паки являющи немощь естества человеческого, глаголюще Тебе: “Господи, уже смердит, четверодневен бо есть”. Обаче Ты паки укрепил еси ю в малодушии ея, глаголюще: “не рех ли ти, яко аще веруеши, узриши Славу Божию”. Мария же, зряще камень отвален от гроба, в притрепетном чаянии пребываше, веру в молчании соблюдающи, и точию в сердце глаголюще: Иисусе, ко гробу друга Лазаря пришедый, очисти ум мой от сумнений неверных. Иисусе, Славу Божию явити восхотевый, сохрани сердце мое от похотей скверных. Иисусе, камень от гроба Лазаря отвалити повелевый, отвали камень жестосердия от гроба души моя. Иисусе, глаголом уст Твоих вся силы ада устрашивый, не устраши мя явлением обетованнаго Славы Твоя. Иисусе Кротчайший, кротко гробу Лазаря представый, кроткою душею сподоби мя

Твое пришествие ощутити. Иисусе Сладчайший, мертвеца смердяща во гробе узревый, смиренным нравом подаждь ми Твою благодать лицезрети. Иисусе, Лазаря прежде Твоя страсти из мертвых воздвигнувый, яви нам Свое Воскресение.

### **Кондак 9**

Все естество Ангельское смятесе, егда Ты, Чудотворче Господи, являя Славу Свою, яко Единородного от Отца, пред лицом множества народного хвалу воздал еси Небесному Отцу, глаголя: “Отче, благодарю Тя, яко услышал еси Мя”, и сия рек, гласом велиим воззвал еси: “Лазаре, гряди вон” и егда бездыханный повеление Твое послушав, абие одушевлен от смерти возста и изыде укроем рукама и ногама обязан, да чудо сие зряще, вся колена небесных и земных и преисподних Тебе Победителю смерти преклонятся, вопиюще: Аллилуиа.

### **Икос 9**

Витии богоглаголивии, аще и много глаголют, но не возмогут достойно прославити велие и страшное чудо Твое, Господи, егда Ты Лазаря Четверодневнога от мертвых воздвигл еси, да Марфу и Марию, с нимиже и всех нас в вере и надежде Воскресения и бессмертия души утвердиши. Сего ради мнози от иудей к Марии пришедших, видевшие, яже Ты сотворил еси в Вифании, вероваша в Тя, яко в Сына Божия и радостно принесоша Тебе похвалы сицевыя: Иисусе, Лазаря мертва Четверодневна воскресивый, и мене умерша страстьми воскреси. Иисусе, друга Твоего повойми связана разрешивый, и мене связана узами греха разреши. Иисусе, мертвеца смердяща от гроба свободивый, и мене из гроба отчаяния изведи. Иисусе, агнца любимаго от пропастей ада исхитивый, и мене от вечныя тьмы кромешныя сохрани. Иисусе, повелением Живоноснаго гласа Твоего воздвигнувый смердящаго, и мене истлевшаго страстьми Словом Твоим оживи. Иисусе, всесильною крепостию Твоею Лазаря Четверодневна возставивый, и мене общника тридневнаго Воскресения Твоего покажи. Иисусе, Лазаря, прежде Твоя страсти из мертвых воздвигнувый, яви нам Свое Воскресение.

### **Кондак 10**

Спасти восхотел еси вся, Христе Спасе, обаче, сынове тьмы, зряще умершаго Лазаря, гласом Твоим от тления возставша, не восхотеша в ожесточении сердец своих уверовати в Тя, и нецыи от них поидоша к первосвященником и фарисеям, и возвестиша им, яже Ты сотворил еси в Вифании. Мы же безумию их не вдающеся, но в общее Воскресение по обетованию Твоему верующе, Тебе, Живодавцу и Спасителю нашему велегласно вопием: Аллилуиа.

### Икос 10

Царю Превсчный, Иисусе! Стены каменные твердо быша первосвященницы иудейстии, егда услышавше, каковое страшною чуди сотворил еси в Вифании, совет восприяша на Тя, глаголюше: “Что сотворим, яко Человек Сей многа знамения творит”. Един же от них, Каиафа, архиерей сый лету тому, рече, яко уне есть, да Един Человек умрет за люди своя, а не весь язык погибнет. И от того убо дне совещаша, да убьют Тя, Христа Своего и Владыку, вкупе же и Лазаря, яко мнози его ради прихождаху от иудей и вероваху в Тя. Сего ради вопием Ти сице: Иисусе, Сыне Божий Безсмертный, Лазаря ради, яко агнец незлобивый на закляние приуготовленный. Иисусе, Спасе наш, человеки судимый, от Каиафы за люди умрети неволею предреченный. Иисусе, на незаконном соборище вкупе с Лазарем на смерть осужденный, не осуди нас на судище Твоем. Иисусе, в верной Вифании, в дому Лазаря печаль на радость преложивый, помяни нас во Царствии Твоем. Иисусе, Креста предназначение в Вифании совершивый, силою Креста Твоего сохрани нас. Иисусе, лъстивых фарисеев чудесы своими устрашивый, воскресением Лазаря возвесели нас. Иисусе, Лазаря прежде Страсти Твоея из мертвых воздвигнувый, яви нам Свое Воскресение.

### Кондак 11

Пение всеумиленное да принесет Тебе, Христе Спасе наш, Вифания верная и Тобою любимая, яко в радость Ты преложил еси печаль ея, Лазаря, воспитание ея, из гроба воздвизая, и да не сетует, яко на малое время Ты отшел еси во Ефрем порицаемый град близь пустыни, идеже ходил еси со ученики Своими, первосвященником заповедь давшим, да имут Тя. Мы же, удивляющесе Твоему о ученицех пред страдании Твоими попечению, поем Тебе: Аллилуиа.

### Икос 11

Свет велий и неизреченный осия Вифанию, егда прежде шести дней бытия Пасхи Ты паки пришел еси в весь сию, Сладчайший Иисусе, идеже любящия Тя сотвориша Тебе преславную вечерю, Лазарево воскресение с радостию и благодарением воспоминающе. Бе же ту и Лазарь един от возлежащих, Марфа же с любовию многою паки служаше Тебе, Мария же от избытка радости, любве и благодарения, приемше литру мира нарда чиста многоценна, помаза пречистии нози Твои, и власы своими отираше я, и храмина исполнися вся от вони масти благовонная. Мы же недостойнии, в радость оных блаженных сообедников Твоих проникнути желающе, со умилением многим вопием Тебе таковая: Иисусе, с мертвецем воскресшим разделивый трапезу, даждь ми выну наслаждаться вечныя Твоея вечери на небеси. Иисусе, Лазаря по воскресении его небесною радостию исполнивый, сподоби мя небесныя мыслити на земли. Иисусе, Марфу трудолюбную се уже второе на вечери по-

служити Тебе достойный, прими мя на Твое служение. Иисусе, Марию, Божиею любовью горящую, нози Твои миром помазати сподобивый, даждь ми духа любви пламенение. Иисусе, Вифанию страннопрятием Тя на вечери зело возвеселивый, возвесели мя посреде трудов отдохновением. Иисусе, Марфины слезы и Мариин плач Лазаревым возстанием скоро утешивый, утеши мя в скорбех Твоим посещением, Иисусе, Лазаря прежде Твоея страсти из мертвых воздвигнувый, яви нам Свое Воскресение.

### **Кондак 12**

Благодать велию даровал еси, Христе, воскрешением Лазаря блаженней Вифанийстей веси, восприявшей Тя. Наутрие сретают Тя в Иерусалиме крест, злохуление, и поношения от злобных фарисей, завистию дышащих, здесь же Ты обрел еси прежде креста любовь, радость, и мир о Дусе Святе. Сего ради да будет Тебе похвала вечная, Вифание, яко Зиждителя страннопряти сподобилася еси: благоуготовися, украси божественне твоя входы, расшири преддверия твоя, да и мы с тобою воспоем прославившему тя Господу: Аллилуиа.

### **Икос 12**

Поюще Твое из мертвых Лазарево воскрешение, поклоняемся величию дел Твоих, Христе, прославляем вседержительство Твое и крайнее снисхождение с неизреченным человеколюбием Твоим и веруем с Марфой, яко воистину Ты еси Христос, Сын Божий, Иже в мир грядый, с Марией же приседем при ногу Твоею, внимающе единому на потребу Божественному Слову Твоему, и сподоби нас молитвами праведнаго Лазаря, друга Твоего, видети Твою светлую над смертью победу, и живоносное Воскресение Твое вопиющим Тебе тако: Иисусе, ада Победителю, с Лазарем Четверодневным из тьмы кромешныя греха изведи мя. Иисусе, смерти Низложителю, с другом Твоим умершим к жизни и воскресению паки воззови мя. Иисусе, Лазаря на острове Крите от злобы фарисейския спасый, имиже веси судьбами спаси мя. Иисусе, тамо его от Апостол во епископа поставивый, от Церкви Твоея не отлучи мя. Иисусе, тому же омофор рукама Богоматери истканый вручивый, под кровом Ея сохрани мя. Иисусе, Лазаря посещения Пречистыя во днех плоти Ея достойный, Тоя предстательства не лиши мя, Иисусе, Лазаря прежде Твоея страсти из мертвых воздвигнувый, яви нам Свое Воскресение.

### **Кондак 13**

О, Сладчайший Иисусе, всех Радосте, Свете Тихий, Живот мира и Воскресение наше! Прими от нас, якоже от Марфы и Марии сие малое благодарение наше о Воскрешении Лазаря от всея души Тебе приносимое, и сотвори ны общницы быти того из гроба возстания, да всеильным Словом Твоим воздвигнеши и нас от всякаго падения греховнаго и смерти вечныя, и сподо-

биши ны получить наследие неувядаемое на небесех, идеже со всеми святыми да воспоем Тебе: Аллилуиа.

**(Этот кондак читается трижды, затем икос 1 и кондак 1)**